

Atvinnuvega- og nýsköpunarráðuneytið
Skúlagötu 4
101 Reykjavík

Akureyri 24.09.2020

Efni: Umsögn Skógræktarinnar um frumvarp til laga um breyting á jarðalögum (einföldun stjórnáslu jarðamála)

Skógræktin þakkar fyrir tækifæri til að gefa umsögn um lagafrumvarpið sem kynnt var á Samráðsgátt 10. september 2020 og gerir eftirfarandi athugasemdir og breytingatillögur:

1. Athugasemdir vegna breytinga á jarðalögum nr. 81/2004

Lagatexti þarf að vera skýr og auðskilinn öllum sem hann lesa, þess vegna ber að varast að fella brott mikilvægar skilgreiningar sem nú eru í 2. gr. laganna. Skógræktin leggst gegn því að skilgreining orðanna landbúnaður og eignarland verði felld brott. Það er að mati Skógræktarinnar afar óheppilegt að ekki sé skýrt í lagatextum að orðið landbúnaður eigi óumdeilanlega einnig við um skógrækt. Þannig megi áfram rækta skóg á landbúnaðarlandi án þess að taka landið úr landbúnaðarnotum, þó landnotkun sé breytt. Fær þetta stuðning í skipulagsreglugerð nr. 90/2013, gr. 4.3.1. lið j, en þar kemur fram að ætlast er til að gert sé grein fyrir skógrækt innan landbúnaðarsvæða.

2. Athugasemdir vegna áhrifa frumvarpsins á lög um skóga og skógrækt nr. 33/2019

Drögin gera ráð fyrir að hugtakið *lögbyli* falli brott og að um lögbyli verði fjallað í búnaðarlögum. Samhliða þessu er lagt til að merkingu hugtaksins verði breytt. Samkvæmt IV. kafla laga um skóga og skógrækt nr. 33/2019 er gert ráð fyrir að Skógræktin veiti framlög til skógræktar á lögbylum. Skógræktin telur þær breytingar sem frumvarpið gerir ráð fyrir ekki falla vel að markmiðum laga um skóga og skógrækt sem taka til alls lands. Ennfremur beinist IV. kafli laganna fyrst og fremst að eignarlandi. Í því ljósi leggur Skógræktin til að samhliða því að fella brott hugtakið lögbyli úr jarðalögum og breytingu á merkingu þess verði gerð sú breyting á lögum um skóga og skógrækt að í stað hugtaksins lögbyli í IV. kafla laganna, nánar tiltekið í kaflaheitinu, 10. gr. og 15. gr. komi hugtakið *eignarland* sbr. skilgreining í lögum nr. 58/1998 um þjóðlendur og ákvörðun marka eignarlanda, þjóðlendna og afrétta. Eignarland: Landsvæði sem er háð einkaeignarrétti þannig að eigandi landsins fer með öll venjuleg eignarráð þess innan þeirra marka sem lög segja til um á hverjum tíma.

3. Breytingatillögur á frumvarpi til laga um breytingar á ýmsum lögum á sviði jarðamála (einföldun stjórnáslu jarðamála)

Til þess að samræma núverandi lög um skóga og skógrækt nr. 33/2019 við þær tillögur sem frumvarpið leggur fram, leggur Skógræktin til að eftirfarandi breyting verði gerð á frumvarpinu:

Lagt er til að eftirfarandi breyting verði gerð á IV. kafla laga um skóga og skógrækt nr. 33/2019, nánar tiltekið 10. og 15. gr., í þeim tilgangi að samræma núverandi skógræktarlög við þær breytingartillögur sem frumvarpið leggur fram:

Kafli IV. *Skógrækt á lögbýlum* verði eftir breytingu IV. Kafli *Skógrækt á eignarlöndum*.

Svofelld breyting verði á 10. gr. laganna að í stað hugtaksins *lögbýli* komi hugtakið *eignarland* og 10. grein hljóði svo:

10. gr.

Skógrækt á eignarlöndum og skjólbeltarækt.

Skógræktin skal veita framlög til skógræktar, þ.m.t. vegna verndar og endurheimtar náttúruskóga, og skjólbeltaræktar á eignarlöndum í samræmi við fjárveitingar til stofnunarinnar og fjárlög.

Skógræktin skal auglýsa eftir þátttökendum í skógrækt á eignarlöndum eftir því sem fjárveitingar heimila. Skógræktinni er heimilt að forgangsraða og hafna umsóknum um þátttöku í skógrækt á eignarlöndum í samræmi við markmið laga þessara og landsáætlun í skógrækt, sbr. 4. gr.

Ráðherra setur í reglugerð nánari ákvæði um málsmeðferð og forgangsröðun umsókna um þátttöku í skógrækt.

Svofelld breyting verði á 15. gr. laganna að í stað hugtaksins *lögbýli* komi hugtakið *eignarland* og 15. grein hljóði svo:

15. gr.

Reglugerð.

Ráðherra setur í reglugerð nánari ákvæði um skógrækt á eignarlöndum, m.a. um gæðaúttekt, árangursmat og samþykktan kostnað.

Að lokum vill Skógræktin koma á framfæri athugasemdum vegna greinargerðarinnar sem fylgir með frumvarpinu. Auk þess að vera ólíðandi löng þá leynast þar athugasemdir á borð við; „Flestum er enda ljóst að skógur er ekki ræktað land“ og „lagt er til að hugtakið landbúnaður verði einnig fellt út enda hefur hugtakið engan tilgang eftir að felldar hafa verið brott valdheimildir ráðherra lausnar lands úr landbúnaðarnotum...“. Vekur slíkt skilningsleysi ANR á eðli skógræktar furðu stofnunarinnar.

Virðingarfyllt,
f.h. Skógræktarinnar



Hrefna Jóhannesdóttir, skipulagsfulltrúi
hrefna@skogur.is